

廿二史考異

元史二

廿二史攷異八十七

錢大昕學

世祖紀一

中統元年親王合丹阿只吉率西道諸王塔察兒也先
哥忽刺察兒瓜都率東道諸王 合丹太宗之子阿
只吉者察合台之孫塔察兒者幹赤斤之孫也先哥
卽移相哥哈撒兒之子忽刺忽兒卽忽列虎兒哈赤
溫之孫瓜都者別里古台之子

孛魯海牙劉肅竝爲真定路宣撫使 孛魯海牙卽布
魯海牙

賜親王穆哥銀二千五百兩 睿宗子末哥大王也

賜先朝皇后帖古倫銀二千五百兩皇后斡者思銀二

千五百兩兀魯忽乃妃子銀五千兩 按后妃表世

祖四斡耳朶無斡者思兀魯忽乃二人而帖古倫大

皇后守世祖大斡耳朶非先朝后也二者當有一誤

二年十二月詔封皇子真金爲燕王領中書省事 按

元史本紀敘事多重複如中統二年十二月書封皇

子真金爲燕王領中書省事而三年十二月又書封

皇子真金爲燕王守中書令至元十二年書割江東

南康路隸江西省而二十二年又書分江浙行省所

治南康隸江西行省二十三年又書以南康路隸江西行省至元十五年書復立河中府萬全縣全當作泉下同而十六年又書復立萬全縣隸河中府至元十五年書改京兆府爲安西路而十六年又書改京兆爲安西路至元二十一年五月書賜北安王竊紐金印而七月又書賜皇子北安王印至元二十五年書改西南番總管府爲永寧路而二十七年又書改西南番總管府爲永寧路至元二十九年書罷徽州路錄事司而三十年又書罷徽州錄事司元貞元年書陞鎮州路之寧都會昌二縣爲州而大德元年又書陞寧

都會昌縣爲州並隸贛州路大德元年書陞全州爲
全寧路而二年又書改泉州爲泉寧府泉卽全之譌
至大二年書封知樞密院事容國公牀兀兒爲句容
郡王而延祐三年又書封牀兀兒爲句容郡王延祐
四年書以大寧路隸遼陽省而五年又書以大寧路
隸遼陽省延祐四年書陞靖州爲路而至治二年又
書陞靖州爲路延祐五年書以者連怯耶兒萬戶府
爲右衛率府而六年又書以者連怯耶兒萬戶府軍
萬人隸東宮置右衛率府至治元年書龍虎山張嗣
成來朝授太元輔化體仁應道大真人而泰定二年

又書加嗣漢三十九代天師張嗣成太元輔化體仁
應道大真人至治三年十月辛丑書諸王怯別遣使
來朝而甲寅又書諸王怯別遣使來朝泰定元年正
月書敕封解州鹽池神爲靈富公而致和元年四月
又書改封鹽池神曰靈富公泰定元年三月書遣湘
寧王八剌失里出鎮察罕腦兒而四年三月又書命
親王八剌失里出鎮察罕腦兒元統二年書四川大
盤洞蠻謀谷什用遣男謀者什用來貢方物卽其地
立盤順府而至正十二年又書四川未附生蠻向亞
甲洞主墨得什用出降立盤順府皆一事而兩三見

者也

世祖紀二

三年二月丙申以興松雲三州隸上都 按陞開平爲

上都在四年五月戊子升望雲縣爲雲州松山縣爲

松州在四年五月庚子不應此時先有上都及松雲

二州之名據下文四月庚戌以望雲松山興州課程

隸開平府可證其時不稱上都也又是年十二月戊

寅書割北京興州隸開平府與此文亦重複

四月賜諸王也相哥金印 卽移相哥也

至元元年給諸王也速不花印 按宗室世系表別里

古台之子潤端之孫皆有名也速不花者攷中統三年賜廣寧王瓜都印乃是別里古台之孫卽也速不花之子不應子之賜印乃先於父則此給印者必潤端之孫矣

與諸王玉龍荅失阿速帶昔里給等 玉龍荅失三人皆憲宗子阿速帶表作阿速反昔里給表作昔里吉世祖紀三

二年分四親王南京屬州鄭州隸合丹鈞州隸明里睢州隸孛羅赤蔡州隸海都它屬縣復還朝廷 按食貨志太宗丁巳年分撥合丹滅里合失潤出汴梁在

城戶至是改以屬州戶賜之也明里卽滅里孛羅赤者濶出之孫卽失列門之子海都則合失之子

五年封諸王習怯吉爲河平王 卽憲宗子昔里吉怯字疑謫

世祖紀四

九年賜南平王禿魯銀印 禿魯定宗之孫表作禿里詔諸路府州司縣達魯花赤管民長官兼管諸軍與魯經世大典序錄云凡軍出征戍家在鄉里日與魯州縣長官結銜兼與魯官以莅之

世祖五

十年命諸王阿不合市藥師子國 阿不合疑卽旭烈兀大王之子阿八哈也

十二年駙馬長吉 長吉表作昌吉

詔中書右丞廉希憲行中書省于江陵府 按十三年又書以北京行中書省廉希憲爲中書右丞行中書省事于荆南府荆南卽江陵府亦一事而重見也

世祖紀六

十三年二月夏貴以淮西諸郡來降惟鎮巢軍復叛貴遣使招之守將洪福殺其使貴親至城下福始降阿朮斬之軍中 按宋史忠義傳貴旣臣服招福不聽

使其從子往福斬之大兵攻城久不拔遣貴至城下
好語語福請單騎入城福信之門啟而伏兵起執福
父子屠城中貴莅殺其二子次及福福大罵數貴不
忠請身南向死以明不背國也福之節義皎皎如此
元史謂貴之城下而福降者誣也

福事附見
姜才傳

十四年二月甲戌西川行院不花率衆數萬至重慶營
浮屠關造梯衝將攻之其夜都統趙安以城降張珏
艤船江中與其妻妾順流至涪州元帥張德潤以舟
師邀之珏遂降 按宋史忠義張珏傳張德潤復破
涪州執守將程聰在十四年六月

宋史於德祐二
年之後書明年

史本紀則書于是年七月其時重慶尙未被兵何緣
珣有出降之事又據本紀是年八月始詔不花行院
四川則是春不花尙未至四川史所載殊踈舛矣宋
史珣傳至元十五年二月珣率兵出薰風門與大將
也速縛兒戰扶桑埧珣兵大潰城中糧盡趙安以書
說珣降不聽安乃與帳下韓忠顯夜開鎮西門降珣
率兵巷戰不支歸索鵠飲左右匿鵠乃以小舟載妻
子東走涪明日萬戶鐵木兒追及于涪執之送京師
珣之被執年月當以宋史爲正汪良臣傳云十五年
春張珣悉衆鏖戰良臣奮擊大破之珣所部開門納

降珏潛遁與宋史年月相合紀誤書於前一年其云
出降亦誣也紐璘傳制置使張珏遁追至涪州擒之
亦不云出降

十二月賜諸王也不干燕帖木兒等 按宗室世系表
宗王名也不干者三人一爲塔察兒之子一爲忽魯
歹之子一爲合丹之子未審所賜何人燕帖木兒則
表未見其名

世祖紀七

十五年八月制封泉州神女號護國明著靈惠協正善
慶顯濟天妃 按本紀至元二十五年六月詔加封

南海明著天妃爲廣祐明著天妃大德三年二月加
封泉州海神曰護國庇民明著天妃天歷二年十月
加封天妃爲護國庇民廣濟福惠明著天妃至正十
四年十月加號海神爲輔國護聖庇民廣濟福惠明
著天妃此天妃封號由二字加至十二字之次第也
梁祀志云神號積至十字此所載封號十二字蓋非
指天歷封號而言祝文同元制也以二十五年加封四字推之則至元初封止
有明著二字紀殆誤矣汪楫使琉球雜錄云天妃光
宗朝封靈惠妃寧宗朝加封助順又加顯衛護國助
順嘉應英烈妃理宗朝加封協正又封靈惠助順嘉

應慈濟妃尋加善慶又進顯濟妃

十一月行中書省自揚州移治杭州 按至元二十一年始徙江淮行省於杭州不應此時卽有移治之事邵晉涵曰攷地理志揚州杭州兩路俱不載至元十五年移行省事惟集慶路云至元十四年初立御史臺於揚州旣而徙杭州又徙江州又還杭州二十三年自杭州徙治建康然則本紀所云十五年自揚州徙治杭州者乃行御史臺非行中書省蓋傳寫誤爾

世祖紀八

十七年二月命梅國賓襲其父應春瀘州安撫使職瀘

州嘗叛應春爲前重慶制置使張珩所殺國賓詣闕
訴冤詔以珩昇國賓使復其父讐珩時在京兆聞之
自經死 按宋史忠義傳珩至安西卽京兆趙老庵其
友謂之曰公盡忠一世以報所事今至此縱得不死
亦何以哉珩乃解弓弦自經廟中與此紀互異未詳
孰是

六月安西王薨

刊本作
西安誤

罷其王相府

按趙炳傳至元

十五年十一月王薨名臣事略亦云十五年冬王薨

十七年王相府罷然則王相府之罷在王薨後二年

紀誤以爲同時事諸王表秦王忙哥刺

卽安西王
蓋封秦王至

元十七年薨此又因本紀而誤

十月賜雲南王忽哥赤印 按忽哥赤於至元四年封

雲南王賜印八年爲寶合丁等毒死此紀所書蓋以
其子也先帖木兒襲封雲南王仍以父印賜之耳諸
王表雲南王也先帖木兒至元十七年襲封可證此
文之誤

十二月以高麗國王王暉爲中書右丞相 按王暉爲
丞相不見於宰相表蓋授爲征東行中書省右丞相
耳

世祖紀九

十九年正月諸王昔里吉與脫脫木兒雙木忽兒撒里
蠻等 按宗室表旭烈兀大王歲都哥大王之孫俱
有脫脫木兒未知孰是雙木忽兒者阿里不哥之子
藥木忽兒也撒里蠻者玉龍蒼失之子

六月己丑朔日有食之 天文志作乙丑刊本之譌也
按是年六月朔日食而七月戊午朔又書日食天文
志亦同邢雲路曰推是年六月朔交二十四日有奇
不入食限不應食七月戊午朔交九刻入食限是日
已時日食合何元史重載六月朔食耶從古無比食
之理郭守敬論之詳矣豈以守敬十八年方定授時

而不辨此此必修史者誤書之也

二十年六月命諸王忽牙都設斷事官 疑卽鎮遠王
牙忽都也

世祖紀十

二十一年閏五月封法里刺王爲郡王佩虎符 按諸
王表怯里歹郡王至元十一年賜印此法字疑怯之
譌也表云十一年而紀書于二十一年蓋表脫二字
世祖紀十一

二十四年二月敕諸王闊里鐵木兒 卽廣寧王徹里
帖木兒

世祖紀十二

二十五年正月賜諸王火你赤銀五百兩 按太宗子

合丹大王之子有火你

賜諸王亦憐真部曲鈔三萬錠 闕端太子之孫

十二月賜按荅兒禿等 按荅兒禿者帖木兒駙馬之

賜號也

見特薛禪傳

二十六年四月立諸王愛牙赤投下人匠提舉司于益都 按世祖第六子名愛牙赤此云諸王則非皇子也宗室世系表幹赤斤位下有愛牙哈赤王滅里位下亦有愛牙赤大王

世祖紀十三

二十七年十一月降南雄州爲保昌縣韶州爲曲江縣
按至元十五年立南雄韶州二路總管府其時蓋
以路領州以州領縣設官猥多至是始省州存縣故
云降也

二十八年正月給諸王愛牙赤印 按二十二年已賜
皇子愛牙赤銀印則此給印者別是一人矣

以札散秃秃合總兵于斡古之地 秃秃合卽土土哈
成宗紀一

至元三十年乙巳受皇太子寶 當云六月乙巳有日

無月史脫文

三十一年封駙馬闊里吉思爲唐王 當云高唐王脫

高字

元貞元年十二月賜諸王押忽禿 卽牙忽都也

成宗紀二

二年三月郡王慶童有疾以其子也里不花代之 此
當是兀魯兀台部之襲封郡王者非宗王也攷木赤
台傳有慶童而無也里不花亦不云慶童有子紀傳
互異今無從攷其是非矣傳有匣剌不花與也里不
花音似相近然傳以匣剌不花爲脫歡之孫則係慶

童之姪孫非其子也

九月令廣海左右兩江戍軍以二年三年更戍海都兀魯思不花部兀魯思不花者河平王昔里吉之子大德二年十二月江浙行省平章政事荅刺罕陞左丞相荅刺罕者哈刺哈孫也本傳大德二年由湖廣平章政事入朝拜江浙行省左丞相未嘗平章江浙也紀疑誤

成宗紀三

五年十月丙辰朔 當是丙寅朔

癸未太陰犯東井壬午車駕還大都 壬午當在癸未

之前

成宗紀四

七年三月小蘭禧岳鉉等進大一統志 小當作卜

九月復木八剌沙平章政事 按是年二月以平章政事行上都留守木八剌沙爲中書平章政事中間初未有罷黜之事非此條重出則史文有脫漏也

九年七月以金千兩銀七萬五千兩鈔十三萬錠賜興聖太后及宿衛臣出居懷州 興聖太后卽武宗仁宗母也此時不當有太后之稱史臣因實錄舊文未及釐正

十月丁丑朔 當作甲戌朔此誤

武宗紀一

大德五年八月與海都戰于迭怯里古之地 牀兀兒
傳作鐵堅古山

十一年六月進封高麗王王昫爲潘陽王加太子太傅
駙馬都尉 按高麗傳王諱成宗初年尙寶塔實憐
公主十一年進封潘陽王紀當云封高麗王王昫之
世子諱爲潘陽王不得云封昫也又按朝鮮史忠烈
王昫三十四年王薨于神孝寺遺教機務委付潘陽
王則潘陽爲諱之封明矣

七月庚辰 按上書七月癸亥朔庚辰爲月之十八日
不當重書七月

御史大夫月兒魯言舊制中書省樞密院御史臺宣政
院許得自選其人它司悉從中書銓擇近臣不得輒
奏如此則紀綱不紊帝嘉納之 按玉昔帖不兒世
祖時爲御史大夫賜號月呂魯那演亦作月兒魯又
作玉呂魯以元貞元年卒此又有御史大夫月兒魯
不知何人恐誤

至大元年三月賜定王藥木忽兒金千五百兩 按是
年六月封藥木忽兒爲定王而三月已書定王藥木

忽兒二年三月封駙馬注安

解木安

爲趙王蓋由高唐

王進封也而其年九月猶書高唐王注安皇慶二年
正月封乞台普濟爲安吉王而至大三年已書安吉
王乞台普濟至順元年三月封王子阿剌忒納荅刺
爲燕王而二月已書燕王阿剌忒納荅刺至正二十
年閏月以甘肅行省左丞相阿吉剌爲太尉而十三
年五月十八年五月兩書太尉阿吉剌皆史臣失於
檢勘也

武宗紀二

二年三月遼陽行省右丞洪重喜訴高麗國王王章

按王章卽王諤改名子見趙孟頫書圓通寺碑篆額者爲潘王王璋卽高麗王也元史作章不从玉旁誤六月宣政院奏免僧道也里可溫荅失蠻租稅按元典章有一條云荅失蠻迭里威失戶若在回回寺內住坐並無事產合行開除外據有營運事產戶數依回回戶體例收差然則荅失蠻乃回回之修行者也至元辨僞錄云釋道兩路各不相妨今先生言道門最高元人稱道士爲先生秀才人言儒門第一迭屑人奉彌失訶言得生天達失蠻叫空謝天賜與細思根本皆難與佛齊達失蠻卽荅失蠻

十二月上太祖聖武皇帝尊諡廟號又上睿宗景襄皇帝尊諡廟號 按太祖睿宗廟號至元三年所上此年惟加上尊諡耳不當云廟號也

仁宗紀一

皇慶元年二月賜世祖諸皇子也先鐵木兒福州路福安縣 按也先鐵木兒乃世祖子忽哥赤之子以下文例之當有脫文

三月乙亥 當作己亥

四月趙王汝安郡告饑 汝當作注郡當作部

二年二月壬戌 是年失書三月十一月自二月丙申

以後皆三月事自十月壬寅以後皆十一月事也

仁宗紀二

延祐二年三月廷試進士賜護都沓兒張起巖等五十
六人及第出身有差 按是年初行科舉自後每科
廷試賜進士及第皆書於本紀惟順帝元統元年賜
同同李齊等百人至正十七年賜悅徵王宗嗣等五
十一人紀皆失書元統癸酉之春庚申君尚未卽位
闕而不書宜也若至正丁酉之脫漏史官難辭其咎
矣

泰定帝紀一

至治三年癸巳卽皇帝位于龍居河 當云九月癸巳
有日無月者史脫文

泰定元年三月冊八八罕氏爲皇后 后妃表后妃傳
特薛禪傳竝作八不罕八不罕者其名也當書宏吉
刺氏不當云八八罕氏

十月乙卯 是年失書十一月自己丑以後皆十一月
事

二年十月戊寅朔 是年失書十一月自戊申以後皆
十一月事

泰定帝紀二

三年十一月庚子 前一月辛未朔則庚子乃今月朔
日也史不書朔脫文又按是年失書十二月自丁丑
以後當屬十二月

明宗紀

諱和世琜 元興章作火失剌

悉發關中兵分道自潼關河中府入 按是時仁宗在

位而周王遼興關中兵拒命是謀反也仁宗紀不書
其事蓋湮諱之既而西行至金山則附於西北諸叛
王矣

泰定皇帝崩于上都倒刺沙專權自用踰月不立君朝

野疑懼 按泰定以七月庚午崩至八月甲午燕帖木兒舉事爲時尚未及三旬元諸帝卽位皆俟諸王大臣畢會議之距前君之崩或兩月或三月初無定期蓋其家法如是况泰定踐阼之日儲位早定朝野本無異議也燕帖木兒逆謀早萌于泰定未崩之先豈因踰月不立君人心疑懼始謀舉事乎此皆實錄之誣詞史臣不能刊正也

文宗紀一

致和元年八月河南行省殺其參政脫孛臺 卽脫別

台也

見伯顏傳

時伯顏爲河南行省平章政事

天歷元年九月乙丑立太禧院 乙丑當作乙亥

十一月己未 史不書朔脫文

文宗紀三

至順元年二月辛卯朔 按上文已書二月壬午朔以

上下月日勘校當爲壬午朔辛卯則月之十日也二

月二字當屬上文給糧賑之爲句朔字衍文

壬午刊本作壬

申誤

文宗紀五

放燕帖古思于高麗 監本於燕字下錯入順帝紀中

語凡四百言

寧宗紀

八月甲寅 上文已書八月己酉此又書八月

順帝紀一

至元元年八月詔以岐陽王完者帖木兒 岐陽當作
淇陽月赤察兒之孫承其祖父封號

順帝紀二

二年十二月以甘肅行省白城子屯田之地賜宗王喃
忽里 按明史哈密傳元末以威武王納忽里鎮之
尋改爲肅王卒弟安克帖木兒嗣永樂二年封爲忠
順王納忽里卽喃忽里也

順帝紀三

至正元年十二月立四川安岳縣 按安岳縣不見於地理志疑潼川府屬縣也

二年七月庚午 以八月庚子朔推之庚午爲是月朔日而史失書朔歐陽原功天馬頌云至正二年七月十八日丁亥二十一日庚寅二十三日壬辰逆計之亦得庚午朔

順帝紀五

十二年三月河南左丞相太不花克復南陽等處 按太不花傳是年拜河南行省平章政事未爲左丞相

也據本紀十四年十二月以河南行省平章政事泰
不花即太不花爲本省左丞相可證十四年以前但爲平
章此稱左丞相者誤

順帝紀六

十三年六月平章政事荅失八都魯總四川軍 按本
紀是年正月以荅失八都魯克復襄陽樊城有功陞
四川行省右丞明年三月始陞本省平章政事此時
不應先稱平章也下文十二月荅失八都魯復均房
等州紀仍書右丞不稱平章

十四年二月立鎮江水軍萬戶府命江浙行省右丞佛

家閭領之 按是年六月紀書江浙行省參知政事
佛家閭此必由參政遷右丞者領萬戶時未爲右丞
也紀前事而稱後官文家往往有之施于紀傳則俱
矣

元史三

廿二史攷異八十八

錢大昕學

歷志一

庚辰歲太宗西征 梅文鼎曰元太祖以己卯歲親征
西域諸國次年庚辰夏五月駐蹕也石的石河有西
域人與耶律楚材爭月蝕而西說竝詘故耶律作歷
託於是年志譌爲太宗則太宗無庚辰也

中書令耶律楚材 案太祖時楚材未爲中書令史因
繫庚辰於太宗故官名亦從之

且以中元庚午歲國兵南伐 案耶律西征新術演紀

上元庚午至太祖庚辰積年二千二十七萬五千二百七十滿一百八十去之

上元中元下元各六
十并之爲百八十也餘數

七十則庚辰爲中元之第十一年故太祖五年爲中

元庚午也

推上元庚子歲天正十一月壬戌朔子正冬至日月合

璧五星聯珠同會虛宿六度以應太祖受命之符

梅文鼎曰耶律作歷以太祖五年始絕金次年伐之

不五年天下略定故推演上元庚午冬至朔旦七曜

齊元爲受命之符謂之西征庚午元歷西征者謂太

祖庚辰也庚午元者上元起算之端也志譌上元爲

庚子則於積年不合

獻公十五年戊寅歲正月甲寅朔旦冬至 案魯獻公
冬至見於漢書律歷志梅勿庵謂未知所據蓋偶失
記耳

歷志二

梁中大通五年癸丑四月己未朔食在丙 案梁書南
史五代志俱不載此食

三統歷積年一十四萬四千五百一十一 案三統術
上元距漢太初元年一十四萬三千一百二十七歲
自太初元年丁丑至至元辛巳中積一千三百八十

四并之爲十四萬四千五百一十一也四分以下積年皆準此例推行到至元辛巳便於布算或者譏其與本志不合殆未審郭氏之旨矣

宣明歷長慶二年壬寅徐昂造 案唐志宣明術不著撰人姓名若徐昂觀象術世已無傳且造于元和初非長慶也其誤始于周琮而守敬因之

奉元歷熙寧七年甲寅衛朴造積年八千三百一十八萬五千二百七十七日法二萬三千七百 案宋志失載奉元術

占天歷崇寧二年癸未姚舜輔造積年二千五百五十

萬一千九百三十七日法二萬八千八十 案宋志

失載占天術

成天歷咸淳七年辛未陳鼎造 案宋志成天術不載

撰人姓名

歷志五

演紀上元庚午距太宗庚辰歲 太宗當作太祖

地理志一

霸州宋升永清郡金置信安軍 案宋承後周之舊亦

爲霸州政和三年賜郡名曰永清蓋宋時諸州皆有
郡名以爲封爵之號其郡名皆依唐舊若五代及遼

增置之州向無郡名故政和中依例賜之初非升州
爲郡且郡名之有無無關於沿革本不必書若有書
有不書又難免罣漏之譏矣又攷宋時以霸州淤口
砦建爲信安軍金大定中降軍爲縣隸霸州然則信
安軍非金所置此志之誤也

薊州宋爲廣川郡金爲中都 當云金屬中都路轉寫
脫謫耳廣川郡名不必書

豐閏下至元二年省入玉田四年以路當衝要復置
按孫慶瑜豐閏縣記太祖庚辰歲升豐閏爲閏州至
元初并入玉田未及周歲縣治仍舊志不言升州事

史之漏也又攷世祖紀稱至元十三年薊州復置豐
潤縣今據慶瑜記成于至元七年其時慶瑜正爲縣
令則紀書十三年復置者誤矣

順州宋爲順興軍 案宋志順州宣和四年賜郡名曰
順興則順興乃郡名志作軍者誤

檀州遼爲武威軍宋爲鎮遠軍 案遼之武威軍爲刺
史軍額宋之鎮遠軍爲節度軍額雖各有軍額而州
名如故也

固安州唐爲固安縣隸幽州宋隸涿水郡金隸涿州
案宋制以州領縣遼時固安隸涿州宣和收復之後

列異
四
固安仍隸涿州金特因宋之舊耳但宋時諸州又有
郡名故宋志于涿州下又有賜郡名曰涿水之文非
改州名爲郡也明初修史諸臣昧于地理妄疑升州
爲郡故有此失

上都路中統元年爲開平府五年以闕庭所在加號上
都至元二年置留守司五年升上都路總管府 案
世祖紀升府爲上都及升總管府皆在中統四年五
月與志互異

順寧府金爲宣德州元初爲宣寧府太宗七年改山東
路總管府 案太宗二年立十路徵收課稅使宣德

其一路也山東路之名不見于紀傳疑未可信

仍至元三年以地震改順寧府 案地理志闕順帝一

朝之事惟有宣德府改順寧奉聖州改保安二條

蔚州 武宗紀至大元年陞蔚州爲蔚昌府志失書

興州領二縣興安宜興 案文宗紀致和元年八月升

宜興縣爲州卽此宜興非常州路之宜興也縣旣升

爲州當改隸上都路土俗相傳以此爲小興州而以

興州爲大興州故明實錄有大小興州之目今爲承

德府地俗名喀喇河屯者卽興州故城也順帝紀至

元五年革興州興安縣志亦未及

松州金爲松山縣元中統三年升爲松州 按世祖紀
松雲二州並置于中統四年五月志于雲州亦云四
年升則松州之升必在四年矣

興和路中統三年升隆興路總管府 攷本紀至元四
年析上都隆興府自爲一路行總管府事至大元年
降隆興爲源州四年復隆興路總管府皇慶元年改
隆興路爲興和路志皆闕而不書但據志中統三年
已升州爲路而紀於至元四年復有析隆興自爲一
路之文似不相照豈此中統乃至元之誤邪抑中間
更有改隸之事而紀失之乎

德寧路領縣一德寧 按德寧淨州秦寧集寧應昌全
寧寧昌七路及砂井總管府志皆闕其沿革予攷特
薛禪傳至元七年斡羅陳萬戶及其妃囊加真公主
請于朝曰本藩所受農土在上都東北三百里蒼兒
海子實本藩駐夏之地可建城邑以居從之遂名其
城爲應昌府二十二年改爲應昌路元貞元年公主
復請于帝以應昌路東七百里駐冬之地創建城邑
大德元年名其城爲全寧路則應昌全寧二路蓋魯
王分地也仁宗紀延祐五年改靜安路爲德寧路靜
安縣爲德寧縣姚燧河內李氏先德碣云歸王世居

靜安黑水之陽郇王卽趙王也文宗紀至順二年趙王不魯納食邑沙淨德寧等處蒙古部民萬六千餘戶饑元典章砂井集寧靜州按打堡子四處壬子年元籍愛不花駙馬位下人戶揭照元籍相同依舊開除然則德寧淨州集寧三路及砂井府皆趙王分地也孛禿傳成宗封阿失爲昌王仁宗朝復賜以寧昌縣稅入公主表孛花弟唆都哥唆都哥子不憐吉歹竝封寧昌郡王則寧昌路蓋昌王分地也惟泰寧路未詳何人分地

淨州路領縣一天山 按金志淨州大定十八年置領

天山一縣屬西京路元時州縣皆仍金舊名延祐四年升州爲路其沿革歷歷可攷不審志何以闕之

秦寧路領縣一秦寧 按仁宗紀延祐二年改遼陽省秦州爲秦寧府四年升府爲路仍置秦寧縣攷金志北京路有秦州治長春縣其地南至懿州八百里東至肇州三百五十里當卽元之秦寧路也

集寧路領縣一集寧 按金志西京之撫州有集寧縣疑卽其地

應昌路領縣一應昌 按應昌府建于至元七年廿二年升府爲路至正初與全寧路俱廢撥屬魯王馬某

沙王傳府十四年復立

全寧路領縣一全寧 按成宗紀大德元年陞全州爲

全寧府

又復載于二年

蓋初立全州尋升爲府七年又升府

爲路也至正初廢十四年復立

砂井總管府領縣一砂井 陳旅贈砂井徐判官詩序

天山之北皋陸演迤聯亘乎大漠趙王之封國在焉

寧昌路領縣一寧昌 按仁宗紀延祐五年置寧昌府

英宗紀至治二年升寧昌府爲路增置一縣

保定路本清苑縣唐隸鄭州

鄭當作鄭

宋升保州金改順天

軍

按宋制州有節度防禦團練刺史

即軍事

四等金

無國練惟節度防禦刺史三等保州在宋爲軍事金
升爲節度州以順天爲軍額而州名如故非改保州
爲軍也修史者不通官制故涉筆便誤

太宗十一年升順天路置總管府 據張柔傳升州爲
府在辛丑歲則爲太宗十三年

博野下至元三十一年立 按王惲烏臺筆補有論復
立博野縣事狀稱祁州博野縣并入蒲陰縣蓋元初
縣屬祁州後并蒲陰至元末復立也

雄州宋爲易陽郡金爲永定軍 按宋金皆爲雄州但
宋爲防禦州金升爲節鎮以永定爲軍額耳宋時諸

州皆有郡名大率沿唐之舊雄霸諸州後周所置向無郡名故政和中特賜之名非改州爲郡也

中山府宋爲中山郡金爲中山府 按宋志政和三年升定州爲中山府改賜郡名曰中山當云宋爲中山府金因之宋時諸州別有郡名但爲封爵之用無關于沿革不足書也

趙州宋爲慶元軍 按宣和元年升趙州爲慶源府其初雖有慶源軍節度之名乃升刺史州爲節度州非改州爲軍也當云宋爲慶源府

冀州宋升安武軍 按此亦升團練州爲節度州以安

武爲軍額而冀州之名如舊非改州爲軍也宋時亦有以軍領縣如太平軍信陽軍漣水軍南康軍之類此固志沿革者所必書然其地望在州之下故常以縣升軍以軍升州未有轉以州升軍者宋志所載由州升軍皆謂由防團刺史升爲節度初非廢州稱軍而明初史臣茫然不察殊可怪也

蠡州唐始置宋改永寧軍金仍爲蠡州 按唐無蠡州宋雍熙四年始以定州博野縣建寧邊軍景德元年改爲永寧軍金天會七年升寧州天德三年更爲蠡州前史所載甚明不知何以踏謬乃爾

磁州唐磁州宋爲滏陽郡 宋亦爲磁州若郡名諸州
皆有之不必書

彰德路唐相州石晉升

刊本作尹誤

彰德軍

按升彰德軍

者謂置彰德軍節度治相州也

大名路五代南漢改大名府 按稱後漢爲南漢惟見
於此

滑州唐改靈昌郡宋改武成軍元仍爲滑州

按唐宋

皆爲滑州唐改州爲郡惟天寶至德十餘載事嗣後
仍爲滑州又置義成軍節度治此宋避太宗諱改義
成軍爲武成而滑州之名無改也志誤

濬州石晉置濬州宋爲通利軍又改平川軍金復爲濬州按五代職方攷不載石晉置濬州事此必志之誤也宋初升黎陽縣爲通利軍後升爲濬州仍置平川軍節度以史例言之當云本黎陽縣宋升通利軍又升濬州

懷慶路元初復爲懷州太宗四年行懷孟州事憲宗六年世祖在潛邸以懷孟二州爲湯沐邑七年改懷孟路總管府至元元年以懷孟路隸彰德路二年復以懷孟自爲一路按中統五年重立孟州三城記稱河南甫定孟猶邊鄙版籍仍希爲懷所并蓋太宗初

定中原以孟州地并於懷故有行懷孟州事之稱曷
思麥里傳云歲壬辰授懷孟州達魯花赤乙卯卒子
密里吉復爲懷孟達魯花赤是其證也予家藏中統
元年祭濟瀆記碑後列宣授懷孟州達魯花赤蜜里
及即密里吉宣授懷孟州總管覃澄提領懷孟州課稅所
官石伯濟名碑立于世祖初尚稱州而不稱路然則
憲宗之世但置總管未嘗改爲懷孟路也中堂事紀
中統二年奉聖旨道與眞定路宣撫司據懷孟達魯
花赤蜜里吉總管覃澄奏告管下地分多有屯住蒙
古頭目遇有關涉詞訟公事不肖前來對證往往不

服勾追以致遲滯公事准奏仰徧諭諸路宣撫司今後各州城管民官遇有關涉蒙古軍人公事理問時分管軍官一員一同聽斷施行毋得偏向准此是中統以前懷孟隸真定路宣撫司非別立一路審矣
孟州宋隸河北道 按十道之名立於唐世宋分天下爲十五路後又析爲十八路又析爲二十三路無諸道之名也當云隸京西北路

故城謂之下孟州新城謂之上孟州元初治下孟州憲宗八年復立上孟州 按元初并孟州于懷曷思麥里父子三人相繼爲懷孟州達魯花赤蓋中統紀元

以前孟未嘗別爲州也攷元重立孟州三城記碑稱
中統二年欽奉聖旨宣授孟州長官并降到立城民
戶至中統四年二月宣差孟州達魯花赤阿里理任
新附之民而并治之是孟州之設實在中統間志不
載并省及復置本末可謂踈而舛矣然史稱憲宗八
年復立上孟州者其誤亦有因據碑稱丁巳年欽奉
恩命復立新孟丁巳卽是憲宗七年與志復立上孟
州之文頗合而碑又云荒殘廢邑復見儀刑又有儻
一旦功成改除它邑云云言邑不言郡則縣而非州
也其所謂復立者移縣治于新孟州城非卽立爲州

也而史遂以爲州所治不亦謬乎

衛輝路唐衛州又爲汲郡金改河平軍 按宋金皆爲
衛州河平乃節度軍額非改州爲軍也

滄州金升臨海軍 按滄州自唐時爲橫海軍節度治
所宋金皆因其名此作臨海誤且州有軍額舊矣亦
非金所升也又世祖紀至元二十五年以滄州之軍
營城爲滄溟縣志亦不書

東平路宋改東平府隸河南道 按宋無十道之名當
云隸京東西路

濟寧路 按至正八年黃河決遷濟寧路于濟州自後

任城遂爲濟寧治所

兗州唐初爲兗州復升泰寧軍宋改襲慶府金改泰定軍 按唐時兗州爲泰寧軍節度治所五代及宋竝爲兗州而節鎮軍額尚仍唐舊徽宗朝升州爲襲慶府金仍爲兗州惟改軍額爲泰定耳志誤

益都路唐青州又升盧龍軍宋改鎮海軍 按盧龍當爲平盧之譌宋改鎮海軍者改其軍額青州之名尚如故也

滕州領二縣滕縣鄒縣 按蘇天爵新升徐州路記至正戊子夏六月詔升徐州爲路割滕嶧邳宿四州隸

焉遷滕之滕縣于薛城裂滕之西南四鄉治之東直
六鄉滕自治之蓋滕縣本州之附郭至正間移縣治
薛城而縣與州不同治故分縣之十鄉半隸縣半隸
州也

般陽府路唐淄州宋屬河南道 當云宋屬京東東路
宋無河南道之名也

初太宗在藩置新城縣 按新城縣下亦云本長山縣
驛臺太宗在潛以人民完聚創置縣曰新城以田索
二鎮屬焉而世祖紀云至元十九年并淄萊路田索
二鎮仍于驛臺立新城縣治殆中廢而復置也

登州宋屬河南道 當云宋屬京東東路

蓬萊下

按登州之蓬萊縣寧海州之牟平縣濱州之

渤海縣德州之安德縣許州之長社縣陳州之宛邱縣鈞州之陽翟縣皆倚郭也而志失書

朔州後唐升鎮武軍 按唐置振武軍節度治朔州非始于後唐職方攷亦無改名鎮武之事志誤

忻州金隸太原府元因之 按王磐撰郝和尚碑云忻州乞忒郡王之屬城也戊子歲升爲九原府志不載升府事史之漏也又攷世祖紀至元三年以崞代堅臺四州隸忻州意其時忻州尚爲九原府故得有屬

州也

保德州舊有倚郭縣元憲宗七年廢縣 按倚郭縣史失其名以金志攷之蓋保德縣也又成宗紀大德元
年以隰州巡檢司爲河曲縣隸保德州志亦失書

河中府宋爲護國軍金復爲河中府 按宋仍唐舊亦爲河中府護國軍乃節度軍額然不始于宋也金爲
河中府亦未廢護國軍節度之額史家失于稽攷故語多舛悞

潞州宋改隆德軍 當云隆德府

澤州宋屬河東道 當云河東路

解州宋屬京兆府金升寶昌軍 府下當有路字京兆
府路卽永興軍路也寶昌軍亦節鎮之額

地理志二

遼陽路梁貞明中阿保機以遼陽故城爲東平郡後唐
升爲南京石晉改爲東京 按遼史天顯三年升南
京十三年改東京以時攷之在後唐石晉之世然是
契丹升之改之非晉唐升之改之也卽欲繫以五代
亦當云後唐時契丹升爲南京石晉時契丹改爲東
京不得如史所云

以廣寧府婆娑府懿州蓋州作四路 婆娑府金之婆

連府路也

懿州初爲懿州路至元六年爲東京支郡 按順帝紀

至正二年升懿州爲路以大寧路所轄興中義州屬

懿州

廣寧府路元封字魯古歹爲廣寧王 卽別里古台

肇州 按金志上京路有肇州舊出河店也天會八年

以太祖兵勝遼肇基王績于此遂建爲州領始興一

縣有鴨子河黑龍江元時立肇州屯田蓋因金之故

名

瀋陽路契丹爲興遼軍金爲昭德軍又更顯德軍 按

攷異

遼志瀋州太宗置興遼軍後更名昭德金史亦爲瀋州昭德軍無更名顯德軍之事

咸平府遼號咸州安東軍領縣曰咸平金升咸平府領平郭安東新興慶雲清安歸仁六縣按金志咸平府領縣八有銅山榮安玉山而無安東

合蘭府水達達等路合蘭府卽金之合懶路

汴梁路唐置汴州總管府石晉爲開封府按唐無總管府之名朱梁受唐禪升汴州爲開封府建爲東都非始于石晉也志皆誤

鄭州宋爲奉寧軍奉寧軍亦節鎮之名非改州爲軍

也

許州金改武昌軍 按許州自唐爲忠武軍節度治所
宋金皆爲節度州金惟改軍額爲昌武而許州之名
仍舊非改府爲軍也武昌當爲昌武

鈞州僞齊置潁順軍金改順州又改鈞州 按金志鈞
州舊陽翟縣僞齊升爲潁順軍大定二十二年升爲
州仍名潁順二十四年夏今名然則金升軍爲州之
初本名潁順州非順州也

陝州宋爲保義軍 按陝州唐末置保義軍節度治此
宋避太宗名改軍名曰保平而陝州之名仍舊志云

宋爲保義軍者誤也

嵩州唐爲陸渾伊闕二縣宋升順州金改嵩州領伊陽
福昌二縣 按宋志無順州之名金志但云舊名順
州不言何代所置此以爲宋升順州未審何據又攷
金志嵩州領伊陽永寧福昌長水四縣此云領伊陽
福昌二縣亦誤

光州宋升光山軍 謂升光州爲節度州以光山爲軍
額也

歸德府後唐爲歸德軍宋升爲南京 按後唐置歸德
軍節度治宋州宋時升州爲應天府建爲南京志不

云升應天府者史之漏也

徐州至元二年例降爲下州 按至正八年升徐州爲
路附郭置彭城縣以邳宿滕嶧四州隸之十三年降
爲武安州以所隸縣屬歸德府其滕嶧二州仍屬益
都路

宿州唐置宋升保靜軍 按宿州升保靜軍亳州升集
慶軍均州爲武當軍房州置保康軍皆節度軍額其
州名初未改也

均州領二縣武當鄖縣 按世祖紀至元十四年均州
復立南漳縣此志南漳屬襄陽路無改隸均州事

房州宋置保寧軍 保寧當作保康

蘄州路 按世祖紀至元二十五年以蘄黃二州隸湖廣省志于蘄州黃州兩州俱不書隸湖廣事亦脫漏也

和州宋隸淮南西道 當云淮南西路

通州宋改靜海郡 按宋時諸州皆有郡名大率沿唐之舊志皆不載惟通州五代所置向無郡名政和末始賜名靜海史家遂誤切改州爲郡矣

德安府 按世祖紀至元三十年改德安府隸黃州路志失書

隨州宋爲崇信軍又爲棗陽軍後因兵亂遷徙無常
按宋初升隨州爲節鎮崇信其軍額也棗陽軍之置
不見于宋志當是南宋末季權升棗陽縣爲軍寄治
于此與崇信軍名同而實異也

元史三終